

तमसो मा ज्योतिर्गमय

SANTINIKETAN
VISWA BHARATI
LIBRARY



T 1

52.7

125459

ଆରୋଗ୍ୟ

ରବୀନ୍ଦ୍ରନାଥ ଠାକୁର



ବିଶ୍ଵଭାରତୀ ଶାସ୍ତ୍ରାଳୟ
୧, ବହିମ ଚାଟୁଜ୍ୟେ ଶ୍ଟ୍ରିଟ, କଲିକାତା

প্রকাশক শ্রীপুলিনবিহারী সেন

বিশ্বভারতী, ৬৩ বারকানাথ ঠাকুর গলি, কলিকাতা

প্রথম প্রকাশ ফাল্গুন, ১৩৪৭

পুনর্মুদ্রণ আশ্বিন, ১৩৫০

মূল্য এক টাকা

মুদ্রাকর শ্রীগঙ্গানারায়ণ ভট্টাচার্য

তাপসী প্রেস, ৩০ কর্নওয়ালিস স্ট্রীট, কলিকাতা

—২২'০—১. ১০. ৪৩

কল্যাণীয় শ্রীমুরেন্দ্রনাথ কর

বহু লোক এসেছিল জীবনের প্রথম প্রভাতে
কেহ বা খেলার সাথী, কেহ কোতূহলী,
কেহ কাজে সঙ্গ দিতে, কেহ দিতে বাধা ।
আজ যারা কাছে আছি এ নিঃশ্ব প্রহরে,
পরিশ্রান্ত প্রদোষের অবসন্ন নিস্তেজ আলোয়
তোমরা আপন দীপ আনিয়াছ হাতে,
খেয়া ছাড়িবার আগে তীরের বিদায়-স্পর্শ দিতে ।
তোমরা পথিক বন্ধু,
যেমন রাত্রির তারা
অন্ধকারে লুপ্তপথ যাত্রীর শেষের ক্লিষ্ট ক্ষণে ॥

উদয়ন

৪ ফেব্রুয়ারি, ১৯৪১

সকাল

সূচী

উৎসর্গ বহু লোক এসেছিল জীবনের প্রথম প্রভাতে

- ১ এ ছ্যলোক মধুময়, মধুময় পৃথিবীর ধূলি
- ২ পরম সুন্দর
- ৩ নির্জন রোগীর ঘর
- ৪ ঘণ্টা বাজে দূরে
- ৫ মুক্ত বাতায়নপ্রান্তে জনশূন্য ঘরে
- ৬ অতি দূরে আকাশের স্কুয়ার পাথুর নীলিমা
- ৭ হিংস্র রাত্রি আসে চুপে চুপে
- ৮ একা ব'সে সংসারের প্রান্ত-জানালায়
- ৯ বিরাট সৃষ্টির ক্ষেত্রে
- ১০ অলস সময় ধারা বেয়ে
- ১১ পলাশ আনন্দমূর্তি জীবনের ফাস্তুনদিনের
- ১২ দ্বার খোলা ছিল মনে, অসতর্কে সেথা অকস্মাৎ
- ১৩ ভালোবাসা এসেছিল একদিন তরুণ বয়সে
- ১৪ প্রত্যহ প্রভাতকালে ভক্ত এ কুকুর
- ১৫ খ্যাতি নিন্দা পার হয়ে জীবনের এসেছি প্রদোষে
- ১৬ দিন পরে যায় দিন স্তব্ধ বসে থাকি
- ১৭ যখন এ দেহ হতে রোগে ও জরায়
- ১৮ ফসল কাটা হলে সারা মাঠ হয়ে যায় ফাঁক
- ১৯ দিদিমণি
- ২০ বিগুদাদা
- ২১ চিরদিন আছি আমি অকোঁজোর দলে
- ২২ নগাধিরাজের দূর নেবু-নিকুঞ্জের

- ২৩ নারী তুমি ধন্য।
 ২৪ অলস শয্যার পাশে জীবন মন্ডরগতি চলে
 ২৫ বিরাট মানবচিত্তে
 ২৬ এ-কথা সে-কথা মনে আসে
 ২৭ বাক্যের যে ছন্দোজাল শিখেছি গাঁথিতে
 ২৮ মিলের চুমকি গাঁথি ছন্দের পাড়ের মাঝে মাঝে
 ২৯ এ জীবনে সুন্দরের পেয়েছি মধুর আশীর্বাদ
 ৩০ ধীরে সন্ধ্যা আসে, একে একে গ্রাসি যত যায় স্থলি
 ৩১ ক্ষণে ক্ষণে মনে হয় যাত্রার সময় বুঝি এল
 ৩২ আলোকের অন্তরে যে আনন্দের পরশন পাই
 ৩৩ এ আমার আবরণ সহজে স্থলিত হয়ে যাক
-

আরোগ্য

এ ছ্যালোক মধুময়, মধুময় পৃথিবীর ধূলি,
 অস্তরে নিয়েছি আমি তুলি,
 এই মহামন্ত্রখানি
 চরিতার্থ জীবনের বাণী ।
 দিনে দিনে পেয়েছিছু সত্যের যা-কিছু উপহার
 মধুরসে ক্ষয় নাই তার ।
 তাই এই মন্ত্রবাণী মৃত্যুর শেষের প্রান্তে বাজে
 সব ক্রতি মিথ্যা করি' অনন্তের আনন্দ বিরাজে ।
 শেষ স্পর্শ নিয়ে যাব যবে ধরণীর
 ব'লে যাব তোমার ধূলির
 তিলক পরেছি ভালে,
 দেখেছি নিত্যের জ্যোতি দুর্যোগের মায়ার আড়ালে ।
 সত্যের আনন্দরূপ এ ধূলিতে নিয়েছে মুরতি
 এই জেনে এ ধূলায় রাখিছু প্রণতি ॥

উদয়ন

১৪ ফেব্রুয়ারি ১৯৪১

সকাল

আরোগ্য

২

পরম সুন্দর
আলোকের স্নানপুণ্য প্রাতে ।
অসীম অরূপ
রূপে রূপে স্পর্শমণি
রসমূর্তি করিছে রচনা,
প্রতিদিন
চিরনূতনের অভিষেক
চিরপুরাতন বেদীতলে ।
মিলিয়া শ্যামলে নীলিমায়
ধরণীর উত্তরীয়
বুনে চলে ছায়াতে আলোতে ।
আকাশের হৃৎস্পন্দন
পল্লবে পল্লবে দেয় দোলা ।
প্রভাতের কণ্ঠ হতে মণিহার করে ঝিলিমিলি
বন হতে বনে ।
পাখিদের অকারণ গান
সাধুবাদ দিতে থাকে জীবনলক্ষ্মীরে ।
সব কিছু সাথে মিশে' মানুষের শ্রীতির পরশ
অমৃতের অর্থ দেয় তারে,
মধুময় করে দেয় ধরণীর ধূলি,
সর্বত্র বিছায়ে দেয় চির মানবের সিংহাসন ।

উদয়ন

১২ জানুয়ারি, ১৯৪১

ছপুর

৩

নির্জন রোগীর ঘর ।
খোলা দ্বার দিয়ে
বাঁকা ছায়া পড়েছে শয্যায় ।
শীতের মধ্যাহ্নতাপে তন্দ্রাতুর বেলা
চলেছে মন্ত্রগতি
শৈবালে দুর্বলশ্রোত নদীর মতন ।
মাঝে মাঝে জাগে যেন দূর অতীতের দীর্ঘশ্বাস
শস্যহীন মাঠে ।

মনে পড়ে কতদিন
ভাঙা পাড়িতলে পদ্মা
কর্মহীন প্রোঢ় প্রভাতের
ছায়াতে আলোতে
আমার উদাস চিন্তা দেয় ভাসাইয়া
ফেনায় ফেনায় ।
স্পর্শ করি শূণ্যের কিনারা
জেলেডিঙি চলে পাল তুলে,
যুথভ্রষ্ট শুভ্র মেঘ পড়ে থাকে আকাশের কোণে ।
আলোতে বিকিয়া-ওঠা ঘটকাঁখে পল্লীমেয়েদের
ঘোমটায় গুপ্তিত আলোপে
গুঞ্জরিত বাঁকাপথে আত্মবনচ্ছায়ে
কোকিল কোথায় ডাকে ক্ষণে ক্ষণে নিভৃত শাখায়,
ছায়ায় কুণ্ঠিত পল্লীজীবনযাত্রার
রহস্যের আবরণ কাঁপাইয়া তোলে মোর মনে ।
পুকুরের ধারে ধারে শর্ষেখেতে পূর্ণ হয়ে যায়
ধরণীর প্রতিদান রৌদ্রের দানের,
সূর্যের মন্দিরতলে পুষ্পের নৈবেদ্য থাকে পাতা ।

আরোগ্য

আমি শাস্ত্র দৃষ্টি মেলি' নিভৃত প্রহরে
পাঠায়েছি নিঃশব্দ বন্দনা,
সেই সবিতারে ষাঁর জ্যোতীরূপে প্রথম মানুষ
মর্ত্যের প্রাক্কণতলে দেবতার দেখেছে স্বরূপ ।
মনে মনে ভাবিয়াছি প্রাচীন যুগের
বৈদিক মন্ত্রের বাণী কণ্ঠে যদি থাকিত আমার
মিলিত আমার স্তব স্বচ্ছ এই আলোকে আলোকে ।
ভাষা নাই ভাষা নাই ;
চেয়ে দূর দিগন্তের পানে
মৌন মোর মেলিয়াছি পাণ্ডুনীল মধ্যাহ্ন-আকাশে ॥

উদয়ন

১ ফেব্রুয়ারি, ১৯৪১

দুপুর

ঘণ্টা বাজে দূরে ।

শহরের অভ্যন্তরীণ আত্মঘোষণার
মুখরতা মন থেকে লুপ্ত হয়ে গেল,
আতপ্ত মাঘের রৌদ্রে অকারণে ছবি এল চোখে
জীবনযাত্রার প্রান্তে ছিল যাহা অনতিগোচর ।

গ্রামগুলি গাঁথে গাঁথে মেঠো পথ গেছে দূর পানে
নদীর পাড়ির 'পর দিয়ে ।

প্রাচীন অশথতলা,
খেয়ার আশায় লোক ব'সে
পাশে রাখি' হাটের পসরা ।
গঞ্জের টিনের চালাঘরে
গুড়ের কলস সারি সারি,
চেটে যায় আগলুরু পাড়ার কুকুর,
ভিড় করে মাছি ।

রাস্তায় উপুড়মুখো গাড়ি,
পাটের বোঝাই ভরা,
একে একে বস্তা টেনে উচ্চস্বরে চলেছে ওজন
আড়তের আঙিনায় ।

বাঁধা-খোলা বলদেরা
রাস্তার সবুজপ্রান্তে ঘাস খেয়ে ফেরে,
লেজের চামর হানে পিঠে ।

শর্ষে আছে স্তূপাকার
গোলায় তোলার অপেক্ষায় ।
জেলেনোকো এল ঘাটে,
ঝুড়ি কাঁখে জুটেছে মেছুনী ;
মাথার উপরে ওড়ে চিল ।

আরোগ্য

মহাজনী নৌকোগুলো ঢালুতটে বাঁধা পাশাপাশি ।
মাল্লা বুনিতেছে জাল রৌদ্রে বসি' চালের উপরে ।
আঁকড়ি' মোষের গলা সাতারিয়া চাষী ভেসে চলে
ওপারে ধানের খেতে ।
অদূরে বনের উর্ধ্বে মন্দিরের চূড়া
ঝলিছে প্রভাত-রৌদ্রালোকে ।
মাঠের অদৃশ্য পারে চলে রেলগাড়ি
ক্ষীণ হতে ক্ষীণতর
ধ্বনিরেখা টেনে দিয়ে বাতাসের বুকে,
পশ্চাতে ধোঁয়ায় মেলি
দূরত্ব-জয়ের দীর্ঘ বিজয়পতাকা ।

মনে এল, কিছুই সে নয়, সেই বহুদিন আগে,
দু-পহর রাতি,
নৌকা বাঁধা গঙ্গার কিনারে ।
জ্যোৎস্নায় চিকণ জল,
ঘনীভূত ছায়ামূর্তি নিষ্কম্প অরণ্য তীরে তীরে,
কচিং বনের ফাঁকে দেখা যায় প্রদীপের শিখা ।
সহসা উঠিলু জেগে ।
শব্দশূন্য নিশীথ আকাশে
উঠিছে গানের ধ্বনি তরুণ কণ্ঠের,
ছুটিছে ভাঁটির স্রোতে তব্বী নৌকা তরতর বেগে ।
মুহূর্তে অদৃশ্য হয়ে গেল ;
দুই পারে স্তব্ধ বনে জাগিয়া রহিল শিহরণ ;
টান্দের-মুকুট-পরা অচঞ্চল রাত্রির প্রতিমা
রহিল নির্বাক হয়ে পরাভূত ঘুমের আসনে ।

পশ্চিমের গঙ্গাতীর, শহরের শেষপ্রান্তে বাসা ।
 দূরপ্রসারিত চর
 শূন্য আকাশের নিচে শূন্যতার ভাষ্য করে যেন ।
 হেথা হোথা চরে গোরু শস্যশেষ বাজরার খেতে ;
 তমুজের লতা হতে
 ছাগল খেদায়ে রাখে কাঠি হাতে কৃষাণ বালক ।
 কোথাও বা একা পল্লীনারী
 শাকের সন্ধানে ফেরে বুড়ি নিয়ে কাঁখে ।
 কভু বহুদূরে চলে নদীর রেখার পাশে পাশে
 নতপৃষ্ঠ ক্লিষ্টগতি গুণটানা মালা একসারি ।
 জলে স্থলে সজীবের আর চিহ্ন নাই সারাবেলা ।
 গোলকচাঁপার গাছ অনাদৃত কাছের বাগানে ;
 তলায়-আসন-গাঁথা বৃদ্ধ মহানিম
 নিবিড় গম্ভীর তার আভিজাত্যচ্ছায়া ।
 রাত্রে সেথা বকের আশ্রয় ।
 হাঁদারায় টানা জল
 নালা বেয়ে সারাদিন কুলু কুলু চলে
 ভুট্টার ফসলে দিতে প্রাণ ।
 ভজিয়া জাঁতায় ভাঙে গম
 পিতল-কাঁকন-পরা হাতে ।
 মধ্যাহ্ন আবিষ্ট করে একটানা সুর ।

পথে-চলা এই দেখাশোনা
 ছিল যাহা ক্ষণচর
 চেতনার প্রত্যস্ত প্রদেশে,
 চিত্তে আজ তাই জেগে ওঠে ;

আরোগ্য

এই সব উপেক্ষিত ছবি
জীবনের সর্বশেষ বিচ্ছেদবেদনা
দূরের ঘণ্টার রবে এনে দেয় মনে ॥

উদয়ন

৩১ জাহ্নসারি, ১৯৪১

বিকাল

৫

মুক্ত বাতায়নপ্রান্তে জনশূন্য ঘরে
বসে থাকি নিস্তরক প্রহরে,
বাহিরে শ্যামল ছন্দে উঠে গান
ধরণীর প্রাণের আহ্বান ;
অমৃতের উৎসস্রোতে
চিত্ত ভেসে চলে যায় দিগন্তের নীলিম আলোতে ।
কার পানে পাঠাইবে স্তুতি
ব্যগ্র এই মনের আকুতি,
অমূল্যেরে মূল্য দিতে ফিরে সে খুঁজিয়া বাণীরূপ,
করে থাকে চুপ,
বলে, আমি আনন্দিত, ছন্দ যায় থামি,
বলে, ধন্য আমি ॥

উদয়ন

২৮ জানুয়ারি, ১৯৪১

বিকাল

আরোগ্য

৬

অতি দূরে আকাশের সুকুমার পাণ্ডুর নীলিমা
অরণ্য তাহারি তলে উর্ধ্ব বাহু মেলি
আপন শ্যামল অর্ঘ্য নিঃশব্দে করিছে নিবেদন ।
মাঘের তরুণ রৌদ্র ধরণীর 'পরে
বিছাইল দিকে দিকে স্বচ্ছ আলোকের উত্তরীয় ।
এ-কথা রাখিলু লিখে
উদাসীন চিত্রকর এই ছবি মুছিবার আগে ॥

উদয়ন

২৪ জানুয়ারি, ১৯৪১


সকাল

হিংস্র রাত্রি আসে চুপে চুপে
 গতবল শরীরের শিথিল অর্গল ভেঙে দিয়ে
 অন্তরে প্রবেশ করে,
 হরণ করিতে থাকে জীবনের গৌরবের রূপ ।
 কালিমার আক্রমণে হার মানেন মন ।
 এ পরাভবের লজ্জা এ অবসাদের অপমান
 যখন ঘনিয়ে ওঠে, সহসা দিগন্তে দেখা দেয়
 দিনের পতাকাখানি স্বর্ণকিরণের রেখা-আঁকা ;
 আকাশের যেন কোন্ দূর কেন্দ্র হতে
 উঠে ধ্বনি মিথ্যা মিথ্যা বলি' ।
 প্রভাতের প্রসন্ন আলোকে
 দুঃখবিজয়ীর মূর্তি দেখি আপনার
 জীর্ণদেহ-দুর্গের শিখরে ॥

উদয়ন

২৭ জানুয়ারি, ১৯৪১

সকাল



আরোগ্য

৮

একা ব'সে সংসারের প্রান্ত-জানালায়
দিগন্তের নীলিমায় চোখে পড়ে অনন্তের ভাষা ।
আলো আসে ছায়ায় জড়িত
শিরীষের গাছ হতে শ্যামলের স্নিগ্ধ সখ্য বহি' ।
বাজে মনে—নহে দূর নহে বহু দূর ।
পথরেখা লীন হোলো অস্তগিরিশিখর-আড়ালে,
স্তব্ধ আমি দিনান্তের পান্থশালা-দ্বারে,
দূরে দীপ্তি দেয় ক্ষণে ক্ষণে
শেষ তীর্থমন্দিরের চূড়া ।
সেথা সিংহদ্বারে বাজে দিন-অবসানের রাগিণী
যার মূর্ছনায় মেশা এ জন্মের যা-কিছু সুন্দর,
স্পর্শ যা করেছে প্রাণ দীর্ঘ যাত্রাপথে
পূর্ণতার ইঙ্গিত জানায়ে ।
বাজে মনে—নহে দূর নহে বহু দূর ॥

উদয়ন

৩ ফেব্রুয়ারি, ১৯৪১

বিকাল

৯

বিরাট সৃষ্টির ক্ষেত্রে
 আতশবাজির খেলা আকাশে আকাশে
 সূর্য তারা ল'য়ে
 যুগযুগান্তের পরিমাপে ।
 অনাদি অদৃশ্য হতে আমিও এসেছি
 ক্ষুদ্র অগ্নিকণা নিয়ে
 এক প্রান্তে ক্ষুদ্র দেশে কালে ।
 প্রস্থানের অঙ্কে আজ এসেছি যেমনি
 দীপশিখা স্নান হয়ে এল,
 ছায়াতে পড়িল ধরা এ খেলার মায়ার স্বরূপ,
 স্নত হয়ে এল ধীরে
 সুখ দুঃখ নাট্যসজ্জাগুলি ।
 দেখিলাম, যুগে যুগে নটনটী বহু শত শত
 ফেলে গেছে নানারঙা বেশ তাহাদের
 রঙ্গশালা-দ্বারের বাহিরে ।
 দেখিলাম চাহি
 শত শত নির্বাপিত নক্ষত্রের নেপথ্যপ্রাঙ্গণে
 নটরাজ নিস্তব্ধ একাকী ॥

উদয়ন

৩ ফেব্রুয়ারি, ১৯৪১

বিকাল

অলস সময় ধারা বেয়ে
মন চলে শূন্যপানে চেয়ে ।
সে মহাশূন্যের পথে ছায়া-আঁকা ছবি পড়ে চোখে ।
কত কাল দলে দলে গেছে কত লোকে
সুদীর্ঘ অতীতে
জয়োদ্ধত প্রবল গতিতে ।
এসেছে সাম্রাজ্যলোভী পাঠানের দল,
এসেছে মোগল,
বিজয়রথের চাকা
উড়ায়েছে ধূলিজাল, উড়িয়াছে বিজয়পতাকা ।
শূন্য পথে চাই
আজ তার কোনো চিহ্ন নাই ।
নির্মল সে নীলিমায় প্রভাতে ও সন্ধ্যায় রাঙালো,
যুগে যুগে সূর্যোদয় সূর্যাস্তের আলো ।
আরবার সেই শূন্যতলে
আসিয়াছে দলে দলে
লৌহবাঁধা পথে
অনলনিঃশ্বাসী রথে
প্রবল ইংরেজ
বিকীর্ণ করেছে তার তেজ ।
জানি তারো পথ দিয়ে বয়ে যাবে কাল
কোথায় ভাসায়ে দেবে সাম্রাজ্যের দেশবেড়া জাল ।
জানি তার পণ্যবাহী সেনা
জ্যোতিষ্কলোকের পথে রেখামাত্র চিহ্ন রাখিবে না ।

আরোগ্য

মাটির পৃথিবী পানে আঁখি মেলি যবে
দেখি সেথা কলকলরবে
বিপুল জনতা চলে
নানা পথে নানা দলে দলে
যুগযুগান্তর হতে মানুষের নিত্য প্রয়োজনে
জীবনে মরণে ।
ওরা চিরকাল
টানে দাঁড়, ধরে থাকে হাল ;
ওরা মাঠে মাঠে
বীজ বোনে, পাকা ধান কাটে ।
ওরা কাজ করে
নগরে প্রান্তরে ।
রাজহুত্বে ভেঙে পড়ে, রণডঙ্কা শব্দ নাহি তোলে,
জয়স্তু মৃতসম অর্থ তার ভোলে,
রক্তমাখা অস্ত্র হাতে যত রক্তআঁখি
শিশুপাঠ্য কাহিনীতে থাকে মুখ ঢাকি ।
ওরা কাজ করে
দেশে দেশান্তরে,
অঙ্গ বঙ্গ কলিঙ্গের সমুদ্র নদীর ঘাটে ঘাটে,
পঞ্জাবে বোম্বাই গুজরাটে ।
গুরু গুরু গর্জন গুন গুন স্বর
দিনরাত্রে গাঁথা পড়ি' দিনযাত্রা করিছে মুখর ।
ছুঃখ সুখ দিবস রজনী
মন্ত্রিত করিয়া তোলে জীবনের মহামন্ত্রধ্বনি ।
শত শত সাম্রাজ্যের ভগ্নশেষ 'পরে
ওরা কাজ করে ॥

উদয়ন

১৩ ফেব্রুয়ারি, ১৯৪১

সকাল

পলাশ আনন্দমূর্তি জীবনের ফাস্তুনদিনের,
আজ এই সম্মানহীনের
দরিদ্র বেলায় দিলে দেখা
যেথা আমি সাথীহীন একা
উৎসবের প্রাঙ্গণ-বাহিরে
শস্যহীন মরুময় তীরে ।
যেখানে এ ধরণীর প্রফুল্ল প্রাণের কুঞ্জ হতে
অনাদৃত দিন মোর নিরুদ্দেশ স্রোতে
ছিন্নবৃন্ত চলিয়াছে ভেসে
বসন্তের শেষে ।
তবুও তো কৃপণতা নাই তব দানে
যৌবনের পূর্ণ মূল্য দিলে মোর দীপ্তিহীন প্রাণে
অদৃষ্টের অবজ্ঞারে করোনি স্বীকার,
ঘুচাইলে অবসাদ তার
জানাইলে চিন্তে মোর লভি অনুক্ষণ
সুন্দরের অভ্যর্থনা, নবীনের আসে নিমন্ত্রণ ॥

উদয়ন

১৩ ফেব্রুয়ারি, ১৯৪১

দুপুর

১২

দ্বার খোলা ছিল মনে, অসতর্কে সেথা অকস্মাৎ
 লেগেছিল কী লাগিয়া কোথা হতে দুঃখের আঘাত,
 সে লজ্জায় খুলে গেল মর্মতলে প্রচ্ছন্ন যে-বল
 জীবনের নিহিত সম্বল ।
 উর্ধ্ব হতে জয়ধ্বনি
 অন্তরে দিগন্তপথে নামিল তখনি,
 আনন্দের বিচ্ছুরিত আলো
 মুহূর্তে আঁধার-মেঘ দীর্ণ করি' হৃদয়ে ছড়ালো ।
 ক্ষুদ্র কোটরের অসম্মান
 লুপ্ত হোলো, নিখিলের আসনে দেখিলু নিজ স্থান,
 আনন্দে আনন্দময়
 চিত্ত মোর করি নিল জয়,
 উৎসবের পথ
 চিনে নিল মুক্তিক্ষেত্রে সর্গোরবে আপন জগৎ ।
 দুঃখ-হানা গ্লানি যত আছে,
 ছায়া সে, মিলাল তার কাছে ॥

উদয়ন

১৪ ফেব্রুয়ারি, ১৯৪১

তুপুর

আরোগ্য

১৩

ভালোবাসা এসেছিল একদিন তরুণ বয়সে
নির্ব্যয়ের প্রলাপকল্লোলেনে,
অজানা শিখর হতে
সহসা বিশ্বয় বহি' আনি'
ক্রভঙ্জিত পাষাণের নিশ্চল নির্দেশ
লজ্জিয়া উচ্ছল পরিহাসে,
বাতাসেরে করি' ধৈর্যহারা,
পরিচয়ধারা মাঝে তরঙ্গিয়া অপরিচয়ের
অভাবিত রহস্যের ভাষা,
চারিদিকে স্থির যাহা পরিমিত নিত্য প্রত্যাশিত
তারি মধ্যে মুক্ত করি' ধাবমান বিদ্রোহের ধারা

আজ সেই ভালোবাসা স্নিগ্ধ সাস্থনার স্তব্ধতায়
রয়েছে নিঃশব্দ হয়ে প্রচ্ছন্ন গভীরে ।
চারিদিকে নিখিলের বৃহৎ শাস্তিতে
মিলেছে সে সহজ মিলনে,
তপস্বিনী রজনীর তারার আলোয় তার আলো,
পূজারত অরণ্যের পুষ্পঅর্ঘ্যে তাহার মাধুরী ।

উদয়ন

৩০ জানুয়ারি, ১৯৪৮

ছপুর

প্রত্যহ প্রভাতকালে ভক্ত এ কুকুর
 স্তব্ধ হয়ে বসে থাকে আসনের কাছে
 যতক্ষণে সঙ্গ তার না করি স্বীকার
 করম্পর্শ দিয়ে ।
 এটুকু স্বীকৃতি লাভ করি'
 সর্বান্তে তরঙ্গি উঠে আনন্দপ্রবাহ ।
 বাক্যহীন প্রাণীলোক মাঝে
 এই জীব শুধু
 ভালো মন্দ সব ভেদ করি'
 দেখেছে সম্পূর্ণ মানুষেরে ;
 দেখেছে আনন্দে যারে প্রাণ দেওয়া যায়
 যারে ঢেলে দেওয়া যায় অহেতুক প্রেম,
 অসীম চৈতন্যলোকে
 পথ দেখাইয়া দেয় যাহার চেতনা ।
 দেখি যবে মূক হৃদয়ের
 প্রাণপণ আত্মনিবেদন
 আপনার দীনতা জানায়ে,
 ভাবিয়া না পাই ও যে কী মূল্য করেছে আবিষ্কার
 আপন সহজ বোধে মানবস্বরূপে ;
 ভাষাহীন দৃষ্টির করুণ ব্যাকুলতা
 বোঝে যাহা বোঝাতে পারে না,
 আমারে বুঝিয়ে দেয় সৃষ্টি মাঝে মানবের সত্য পরিচয় ॥

উদয়ন

৭ পৌষ, ১৩৪৭

সকাল

খ্যাতি নিন্দা পার হয়ে জীবনের এসেছি প্রদোষে,
বিদায়ের ঘাটে আছি ব'সে ।
আপনার দেহটারে অসংশয়ে করেছি বিশ্বাস,
জরার সুযোগ পেয়ে নিজেরে সে করে পরিহাস,
সকল কাজেই দেখি কেবলি ঘটায় বিপর্যয়,
আমার কতৃৎ করে ক্ষয় ;
সেই অপমান হতে বাঁচাতে যাহারা
অবিশ্রাম দিতেছে পাহারা,
পাশে যারা দাঁড়ায়েছে দিনান্তের শেষ আয়োজনে,
নাম না-ই বলিলাম তাহারা রহিল মনে মনে ।
তাহারা দিয়েছে মোরে সৌভাগ্যের শেষ পরিচয়,
ভুলায়ে রাখিছে তারা দুর্বল প্রাণের পরাজয় ;
এ-কথা স্বীকার তারা করে
খ্যাতি প্রতিপত্তি যত সুযোগ্য সক্ষমদের তরে
তাহারাই করিছে প্রমাণ
অক্ষমের ভাগ্যে আছে জীবনের শ্রেষ্ঠ যেই দান ।
সমস্ত জীবন ধ'রে খ্যাতির খাজনা দিতে হয়
কিছু সে সহে না অপচয়,
সব মূল্য ফুরাইলে যে দৈন্ত প্রেমের অর্ঘ্য আনে
অসীমের স্বাক্ষর সেখানে ॥

উদয়ন

৯ জানুয়ারি, ১৯৪১

সকাল

১৬

দিন পরে যায় দিন, স্তব্ধ বসে থাকি,
 ভাবি মনে জীবনের দান যত কত তার বাকি
 চুকায়ে সঞ্চয় অপচয় ।
 অযত্নে কী হয়ে গেছে ক্ষয়,
 কী পেয়েছি প্রাপ্য যাহা, কী দিয়েছি যাহা ছিল দেয়,
 কী রয়েছে শেষের পাথেয় ।
 যারা কাছে এসেছিল যারা চলে গিয়েছিল দূরে
 তাদের পরশখানি রয়ে গেছে মোর কোন্ সুরে ।
 অন্তমনে কারে চিনি নাই,
 বিদায়ের পদধ্বনি প্রাণে আজ বাজিছে বৃথাই,
 হয়তো হয়নি জানা ক্ষমা ক'রে কে গিয়েছে চলে
 কথাটি না ব'লে ।
 যদি ভুল ক'রে থাকি তাহার বিচার
 ক্ষোভ কি রাখিবে তবু যখন রবো না আমি আর ।
 কত সূত্র ছিল হোলো জীবনের আন্তরগময়
 জোড়া লাগাবারে আর রবে না সময় ।
 জীবনের শেষপ্রান্তে যে প্রেম রয়েছে নিরবধি
 মোর কোনো অসম্মান তাহে ক্ষতচিহ্ন দেয় যদি
 আমার মৃত্যুর হস্ত আরোগ্য আনিয়া দিক তারে
 এ-কথাই ভাবি বারে বারে ॥

উদয়ন

১৩ ফেব্রুয়ারি, ১৯৪১

বিকাল

আরোগ্য

১৭

যখন এ দেহ হতে রোগে ও জরায়
দিনে দিনে সামর্থ্য ঝরায়,
যৌবন এ জীর্ণ নীড় পিছে ফেলে দিয়ে যায় ফাঁকি
কেবল শৈশব থাকে বাকি ।
বন্ধ ঘরে কর্মক্ষুর সংসার-বাহিরে
অশক্ত সে শিশুচিত্ত মা খুঁজিয়া ফিরে ।
বিত্তহারা প্রাণ লুপ্ত হয়
বিনামূল্যে স্নেহের প্রশ্রয়
কারো কাছে করিবারে লাভ
যার আবির্ভাব
ক্ষীণজীবিতেরে করে দান
জীবনের প্রথম সম্মান ।
“থাকো তুমি” মনে নিয়ে এইটুকু চাওয়া
কে তারে জানাতে পারে তার প্রতি নিখিলের দাওয়া
শুধু বেঁচে থাকিবার ।
এ বিষয় বারবার
আজি আসে প্রাণে,
প্রাণলক্ষ্মী-ধরিত্রীর গভীর আস্থানে
মা দাঁড়ায় এসে
যে মা চিরপুরাতন নূতনের বেশে ॥

উদয়ন

২১ জানুয়ারি, ১৯৪১

বিকাল

১৮

ফসল কাটা হ'লে সারা মাঠ হয়ে যায় ফাঁক
 অনাদরের শস্য গজায় তুচ্ছ দামের শাক ।
 আঁচল ভরে তুলতে আসে গরিবঘরের মেয়ে,
 খুশি হয়ে বাড়িতে যায়, যা জোটে তাই পেয়ে ।
 আজকে আমার চাষ চলে না, নাই লাঙলের বালাই
 পোড়ো মাঠের কুঁড়েমিতে মস্তুর দিন চালাই ।
 জমিতে রস কিছু আছে শক্ত যায়নি আঁটি,
 ফলায় না সে ফল তবুও সবুজ রাখে মাটি ।
 শ্রাবণ আমার গেছে চলে নাই বাদলের ধারা,
 অত্নান সে সোনার ধানের দিন করেছে সারা ।
 চৈত্র আমার রোদে পোড়া, শুকনো যখন নদী
 বুনো ফলের ঝোপের তলায় ছায়া বিছায় যদি,
 জানব আমার শেষের মাসে ভাগ্য দেয়নি ফাঁকি,
 শ্যামল ধরার সঙ্গে আমার বাঁধন রইল বাকি ॥

উদয়ন

১০ জানুয়ারি, ১৯৪১

সকাল

দিদিমণি,
অফুরান সাস্তনার খনি ।
কোনো ক্লান্তি কোনো ক্লেশ
মুখে চিহ্ন দেয় নাই লেশ ।
কোনো ভয় কোনো ঘৃণা কোনো কাজে কিছুমাত্র গ্লানি
সেবার মাধুর্যে ছায়া নাহি দেয় আনি ।
এ অখণ্ড প্রসন্নতা ঘিরে তারে রয়েছে উজ্জলি,
রচিতেছে শান্তির মণ্ডলী ;
ক্ষিপ্ত হস্তক্ষেপে
চারিদিকে স্বস্তি দেয় ব্যোপে ;
আশ্বাসের বাণী সুমধুর
অবসাদ করি দেয় দূর ।
এ স্নেহমাধুর্যধারা
অক্ষম রোগীকে ঘিরে আপনার রচিছে কিনারা ;
অবিরাম পরশ চিস্তার
বিচিত্র ফসলে যেন উর্বর করিছে দিন তার ।
এ মাধুর্য করিতে সার্থক
এতখানি নির্বলের ছিল আবশ্যক ।
অবাক হইয়া তারে দেখি,
রোগীর দেহের মাঝে অনন্ত শিশুরে দেখেছে কি ॥

উদয়ন

২ জানুয়ারি, ১৯৪১

২০

বিগুদাদা,—

দীর্ঘবপু দৃঢ়বাহু দুঃসহ কর্তব্যে নাহি বাধা,
বুদ্ধিতে উজ্জল চিত্ত তার
সর্বদেহে তৎপরতা করিছে বিস্তার ।
তদ্রূপ আড়ালে
রোগক্লিষ্ট ক্লান্ত রাত্রিকালে
মূর্তিমান শক্তির জাগ্রত রূপ প্রাপ্তে
বলিষ্ঠ আশ্বাস বহি' আনে,
নির্নিমেষ নক্ষত্রের মাঝে
যেমন জাগ্রত শক্তি নিঃশব্দ বিরাজে
অমোঘ আশ্বাসে
সুপ্ত রাত্রে বিশ্বের আকর্ষণ ।
যখন সুধায় মোরে দুঃখ কি রয়েছে কোনোখানে
মনে হয়, নাই তার মানে,
দুঃখ মিছে ভ্রম
আপন পৌরুষে তারে আপনি করিব অতিক্রম ।
সেবার ভিতরে শক্তি দুর্বলের দেহে করে দান
বলের সম্মান ।

উদয়ন

৯ জানুয়ারি, ১৯৪১

সকাল

চিরদিন আছি আমি অকেজোর দলে ;
 বাজে লেখা বাজে পড়া দিন কাটে মিথ্যা বাজে ছলে ।
 যে গুণী কাটাতে পারে বেলা তার বিনা আবশ্যকে
 তারে এসো এসো ব'লে যত্ন ক'রে বসাই বৈঠকে ।
 কেজো লোকদের ভয়,
 কব্জিতে ঘড়ি বেঁধে শত্রু ক'রে বেঁধেছে সময়,—
 বাজে খরচের তরে উদ্ধৃত কিছুই নেই হাতে
 আমাদের মতো কুঁড়ে লজ্জা পায় তাদের সাক্ষাতে ।
 সময় করিতে নষ্ট আমরা ওস্তাদ,
 কাজের করিতে ক্ষতি নানামতো পেতে রাখি ফাঁদ ।
 আমার শরীরটা যে ব্যস্তদের তফাতে ভাগায়,
 আপনার শক্তি নেই পরদেহে মাণ্ডুল লাগায় ।
 সরোজদাদার দিকে চাই
 সব তাতে রাজি দেখি, কাজকর্ম যেন কিছু নাই,
 সময়ের ভাণ্ডারেতে দেওয়া নেই চাবি,
 আমার মতন এই অক্ষমের দাবি
 মেটাবার আছে তার অক্ষুণ্ণ উদার অবসর,
 দিতে পারে অকুপণ অক্লান্ত নির্ভর ।
 দ্বিপ্রহর রাত্রিবেলা স্তিমিত আলোকে
 সহসা তাহার মূর্তি পড়ে যবে চোখে
 মনে ভাবি আশ্বাসের তরী বেয়ে দূত কে পাঠালে,
 হুঃস্বপ্নের হুঃস্বপ্ন কাটালে ।
 দায়হীন মানুষের অভাবিত এই আবির্ভাব
 দয়াহীন অদৃষ্টের বন্দীশালে মহামূল্য লাভ ॥

উদয়ন

৯ জানুয়ারি, ১৯৪১

সকাল

২২

নগাধিরাজের দূর নেবু-নিকুঞ্জের
রসপাত্রগুলি
আনিল এ শয্যাতে
জনহীন প্রভাতের রবির মিত্রতা,
অজানা নিখরিশীর
বিচ্ছুরিত আলোকচ্ছটার
হিরণ্য লিপি,
সুনিবিড় অরণ্যবীথির
নিঃশব্দ মর্মরে বিজড়িত
স্নিগ্ধ হৃদয়ের দৌত্যখানি ।
রোগপঙ্খ লেখনীর বিরল ভাষার
ইঙ্গিতে পাঠায় কবি আশীর্বাদ তার

আরোগ্য

২৩

নারী তুমি ধন্যা,
আছে ঘর আছে ঘরকন্না ।
তারি মধ্যে রেখেছ একটুখানি ফাঁক ।
সেখা হতে পশে কানে বাহিরের দুর্বলের ডাক ।
নিয়ে এস গুঞ্জার ডালি,
স্নেহ দাও ঢালি ।
যে জীবলক্ষ্মীর মনে পালনের শক্তি বহমান
নারী তুমি নিত্য শোনো তাহারি আহ্বান ।
সৃষ্টি-বিধাতার
নিয়েছ কর্মের ভার,
তুমি নারী
তাঁহারি আপন সহকারী ।
উন্মুক্ত করিতে থাকো আরোগ্যের পথ,
নবীন করিতে থাকো জীর্ণ যে-জগৎ,
শ্রীহারা যে তার 'পরে তোমার ধৈর্যের সীমা নাই,
আপন অসাধ্য দিয়ে দয়া তব টানিছে তারাই ।
বুদ্ধিভ্রষ্ট অসহিষ্ণু অপমান করে বারে বারে
চক্ষু মুছে ক্ষমা করো তারে ।
অকৃতজ্ঞতার দ্বারে আঘাত সহিছ দিনরাতি,
লও শির পাতি ।
যে অভাগ্য নাহি লাগে কাজে
প্রাণলক্ষ্মী ফেলে যারে আবর্জনামাঝে
তুমি তারে আনিছ কুড়ায়ে,
তার লাঞ্ছনার তাপ স্নিগ্ধ হস্তে দিতেছ জুড়ায়ে ।

দেবতারে যে পূজা দেবার
দুর্ভাগারে করো দান সেই মূল্য তোমার সেবার ।
বিশ্বের পালনী শক্তি নিজ বীর্ষে বহ চূপে চূপে
মাধুরীর রূপে ।
ভ্রষ্ট যেই ভগ্ন যেই বিরূপ বিকৃত
তারি লাগি সুন্দরের হাতের অমৃত ।

উদয়ন

১৩ জানুয়ারি, ১৯৪১

সকাল

আরোগ্য

২৪

অলস শয্যার পাশে জীবন মন্থরগতি চলে,
রচে শিল্প শৈবালের দলে ।
মর্যাদা নাইকো তার তবু তাহে রয়
জীবনের স্বল্পমূল্য কিছু পরিচয় ।

উদয়ন

২৩ জানুয়ারি, ১৯৪১

সকাল

১৫

বিরাট মানবচিন্তে
অকথিত বাণীপুঞ্জ
অব্যক্ত আবেগে ফিরে কাল হতে কালে
মহাশূন্যে নীহারিকা সম ।
সে আমার মনঃসীমানার
সহসা আঘাতে ছিন্ন হয়ে
আকারে হয়েছে ঘনীভূত,
আবর্তন করিতেছে আমার রচনা-কক্ষপথে ॥

উদয়ন

৫ ডিসেম্বর, ১৯৪০

সকাল

এ-কথা সে-কথা মনে আসে
বর্ষাশেষে শরতের মেঘ যেন ফিরিছে বাতাসে ।
কাজের বাঁধনহারা শূন্যে করে মিছে আনাগোনা,
কখনো রূপালি আঁকে কখনো ফুটায়ৈ তোলে সোনা ।
অদ্ভুত মূর্তি সে রচে দিগন্তের কোণে
রেখার বদল করে পুনঃ পুনঃ যেন অশ্রুমনে ।
বাষ্পের সে শিল্পকাজ যেন আনন্দের অবহেলা,
কোনোখানে দায় নেই তাই তার অর্থহীন খেলা ।
জাগার দায়িত্ব আছে কাজ নিয়ে তাই ওঠাপড়া ।
ঘুমের তো দায় নেই, এলোমেলো স্বপ্ন তাই গড়া ।
মনের স্বপ্নের ধাত চাপা থাকে কাজের শাসনে,
বসিতে পায় না ছুটি স্বরাজ-আসনে ।
যেমনি সে পায় ছাড়া খেয়ালে খেয়ালে করে ভিড় ।
স্বপ্ন দিয়ে রচে যেন উড়ুক্ষু পাখির কোন্ নীড় ।
আপনার মাঝে তাই পেতেছি প্রমাণ
স্বপ্নের এ পাগলামি বিশ্বের আদিম উপাদান ।
তাহারে দমনে রাখে ধ্রুব করে সৃষ্টির প্রণালী
কর্তৃৎ প্রচণ্ড বলশালী ।
শিল্পের নৈপুণ্য এই উদ্দামেরে শৃঙ্খলিত করা,
অধরাকে ধরা ।

উদয়ন

২৩ জানুয়ারি, ১৯৪১

হুপুর

বাক্যের যে ছন্দোজাল শিখেছি গাঁথিতে
সেই জালে ধরা পড়ে
অধরা যা চেতনার সতর্কতা ছিল এড়াইয়া
অগোচরে মনের গহনে ।
নামে বাঁধিবারে চাই না মানে নামের পরিচয় ।
মূল্য তার থাকে যদি
দিনে দিনে হয় তাহা জানা
হাতে হাতে ফিরে ।
অকস্মাৎ পরিচয়ে বিস্ময় তাহার
ভুলায় যদি বা,
লোকালয়ে নাহি পায় স্থান
মনের সৈকততটে বিকীর্ণ সে রহে কিছুকাল,
লালিত যা গোপনের
প্রকাশের অপমানে
দিনে দিনে মিশায় বালুতে ।
পণ্যহাটে অচিহ্নিত পরিত্যক্ত রিক্ত এ জীর্ণতা
যুগে যুগে কিছু কিছু দিয়ে গেছে অখ্যাতির দান
সাহিত্যের ভাষা-মহাদ্বীপে
প্রাণহীন প্রবালের মতো ॥

উদয়ন

৪ ফেব্রুয়ারি, ১৯৪১

বিকাল

আরোগ্য

২৮

মিলের চুমকি গাঁথি ছন্দের পাড়ের মাঝে মাঝে
অকেজো অলসবেলা ভরে ওঠে শেলাইয়ের কাজে ।
অর্থভরা কিছুই না চোখে ক'রে ওঠে ঝিলমিল
ছড়াটার ফাঁকে ফাঁকে মিল ।

গাছে গাছে জোনাকির দল
করে ঝলমল

সে নহে দীপের শিখা, রাত্রি খেলা করে আঁধারেতে
টুকরো আলোক গঁথে গঁথে ।

মেঠো গাছে ছোটো ছোটো ফুলগুলি জাগে,
বাগান হয় না তাহে রঙের ফুটকি ঘাসে লাগে ।
মনে থাকে কাজে লাগে সৃষ্টিতে সে আছে শত শত
মনে থাকবার নয় সেও ছড়াছড়ি যায় কত ।

ঝরনায় জল ঝরে উর্বরা করিতে চলে মাটি,
ফেনাগুলো ফুটে ওঠে পরস্পরে যায় ফাটি ফাটি ।
কাজের সঙ্গেই খেলা গাঁথা—

ভার তাহে লঘু রয় খুশি হন সৃষ্টির বিধাতা ।

উদয়ন

২৩ জানুয়ারি, ১৯৪১

সকাল

২৯

এ জীবনে সুন্দরের পেয়েছি মধুর আশীর্বাদ,
মানুষের শ্রীতিপাত্রে পাই তাঁরি সুধার আশ্বাদ ।
দুঃসহ দুঃখের দিনে
অক্ষত অপরাঙ্কিত আত্মারে লয়েছি আমি চিনে ।
আসন্ন মৃত্যুর ছায়া যেদিন করেছি অনুভব
সেদিন ভয়ের হাতে হয়নি দুর্বল পরাভব ।
মহত্তম মানুষের স্পর্শ হতে হইনি বঞ্চিত,
তাঁদের অমৃত বাণী অন্তরেতে করেছি সঞ্চিত ।
জীবনের বিধাতার যে দাক্ষিণ্য পেয়েছি জীবনে
তাহারি স্মরণলিপি রাখিলাম সকৃতজ্ঞ মনে ॥

উদয়ন

২৮ জানুয়ারি, ১৯৪১

বিকাল

ধীরে সন্ধ্যা আসে, একে একে গ্রহি যত যায় স্থলি'
প্রহরের কর্মজাল হতে । দিন দিল জলাঞ্জলি
খুলি' পশ্চিমের সিংহদ্বার
সোনার ঐশ্বর্য তার
অন্ধকার-আলোকের সাগরসংগমে ।
দূর প্রভাতের পানে নত হয়ে নিঃশব্দে প্রণমে ।
চক্ষু তার মুদে আসে, এসেছে সময়
গভীর ধ্যানের তলে আপনার বাহ্য পরিচয়
করিতে মগন ।
নক্ষত্রের শাস্তিক্ষেত্র অসীম গগন
যেথা ঢেকে রেখে দেয় দিনক্ৰীর অরূপ সত্তারে
সেথায় করিতে লাভ সত্য আপনারে
খেয়া দেয় রাত্রি পারাবারে ।

উদয়ন

১৬ ফেব্রুয়ারি ১৯৪১

হুপুর

৩১

ক্ষণে ক্ষণে মনে হয় যাত্রার সময় বুঝি এল
 বিদায়দিনের 'পরে আবরণ ফেলো
 অপ্রগল্ভ সূর্যাস্ত-আভার
 সময় যাবার
 শাস্ত হোক স্তব্ধ হোক, স্মরণসভার সমারোহ
 না রচুক শোকের সন্মোহ ।
 বনশ্রুণী প্রস্থানের দ্বারে
 ধরণীর শান্তিমন্ত্র দিক্ মৌন পল্লবসস্তারে ।
 নামিয়া আসুক ধীরে রাত্রির নিঃশব্দ আশীর্বাদ
 সপ্তর্ষির জ্যোতির প্রসাদ ॥

আলোকের অস্তরে যে আনন্দের পরশন পাই
জানি আমি তার সাথে আমার আত্মার ভেদ নাই ।
এক আদি জ্যোতিউৎস হতে
চৈতন্যের পুণ্যস্রোতে
আমার হয়েছে অভিষেক
ললাটে দিয়েছে জয়লেখ,
জানায়েছে অমৃতের আমি অধিকারী
পরম আমার সাথে যুক্ত হতে পারি
বিচিত্র জগতে
প্রবেশ লভিতে পারি আনন্দের পথে ॥

৩৩

এ আমার আবরণ সহজে স্থলিত হয়ে যাক,
চৈতন্যের শুভ্র জ্যোতি
ভেদ করি' কুহেলিকা
সত্যের অমৃত রূপ করুক প্রকাশ ।
সর্ব মানুষের মাঝে
এক চিরমানবের আনন্দকিরণ
চিত্তে মোর হোক বিকীরিত ।
সংসারের ক্ষুর্তার স্তব্ধ উর্ধ্বলোকে
নিত্যের যে শান্তিরূপ তাই যেন দেখে যেতে পারি,
জীবনের জটিল যা বহু নিরর্থক,
মিথ্যার বাহন যাহা সমাজের কৃত্রিম মূল্যেই,
তাই নিয়ে কাঙালের অশান্ত জনতা
দূরে ঠেলে দিয়ে
এ জন্মের সত্য অর্থ স্পষ্ট চোখে জেনে যাই যেন
সীমা তার পেরবার আগে ॥

উদয়ন

১১ মাঘ, ১৩৪৭

সন্ধ্যা

Barcode : 4990010228083

Title - Arogya

Author - Tagore, Rabindranath

Language - bengali

Pages - 56

Publication Year - 1941

Barcode EAN.UCC-13

